
Fra: Postmottak Samnanger
Sendt: torsdag 23. april 2020 07:14
Til: Jan Erik Boge; Marianne Soleng
Emne: VS: Interpellasjon og grunngjeve spørsmål

Fra: Øyvind Strømmen <oyvindstrommen@gmail.com>

Sendt: onsdag 22. april 2020 18:49

Til: Postmottak Samnanger <postmottak@samnanger.kommune.no>; Knut Harald Frøland <knut.harald.froland@samnanger.kommune.no>; Charlotte Hageberg <charlotte.hageberg@samnanger.kommune.no>; oskarroen@gmail.com; Magni Petersen <magni.petersen@samnanger.kommune.no>

Emne: Interpellasjon og grunngjeve spørsmål

Her kjem to ting til kommunestyremøtet, ein interpellasjon og eit grunngjeve spørsmål:

Grunngjeve spørsmål frå Øyvind Strømmen (MDG) om det gamle deponiet i Gruvo
Miljøpartiet Dei Grøne er kjende med at det 30. mars 2020 vart gjennomført kontroll i det gamle deponiet i Gruvo på Utskot, ved Zbigniew Nieznalski i BIR AS. I kontrollen vart det mellom anna registrert at tildekkinga med stein og jord ikkje vart gjort tilstrekkeleg godt, og at det renn sigevatn frå deponiet rett i fjorden. Underteikna har også fått orientering frå administrasjonen om at Samnanger kommune vil ta prøvar av sigevatn for å undersøka eventuelt innhald av miljøskadelege stoff, og at vidare tiltak må vurderast etter dette.

På denne bakgrunn stiller eg følgjande grunngjevne spørsmål:

Når er eller skal slike prøvar takast? Er det vurdert andre prøver i tillegg?

Kva tiltak kan vera aktuelle?

--

Interpellasjon frå Øyvind Strømmen (MDG)

Då Hordaland fylkeskommune vedtok å innføra sju takstsoner for Skyss i Hordaland fylke vart Samnanger plassert i same sone som Kvam, Vaksdal og Modalen, sone F. Samstundes vart det bestemt at den nye sonestrukturen skal evaluerast. Etter det underteikna forstår skal ei slik evaluering leggjast fram på møte i samferdselsutvalet i Vestland fylke i mai månad.

Evalueringa går inn i ein prosess rundt nye sonestruktur for Vestland fylke, som eit resultat av fylkessamanslåinga, og av at det då er naturleg å samordna sonestrukturen i gamle Hordaland og gamle Sogn og Fjordane fylker.

3. juli 2019 oppdatert Transportøkonomisk institutt inndelinga av norske kommunar i bu- og arbeidsmarknadsregionar. Av denne inndelinga framgår det at Samnanger er ein del av BA-region Bergen, til liks med kommunane Bergen, Askøy, Øygarden, Bjørnafjorden, Osterøy og Vaksdal. Det er ei kjend sak at Samnanger har ei stor grad av utpendling, og at ein svært stor andel av denne utpendlinga går til Bergen kommune. I tillegg til frekvens er pris viktig for å få fleire til å nytta seg av kollektivtransport, og slik for å redusera privatbilismen.

På denne bakgrunn stiller underteikna følgjande spørsmål til ordføraren:

Kva gjer Samnanger kommune for å påverka arbeidet som no skjer med evaluering av eksisterande sonestruktur, og utarbeiding av ny sonestruktur?

Vidare vert det fremme følgjande framlegg til vedtak:

Samnanger kommunestyre er kjende med at det går føre seg ei evaluering av sonestrukturen til Skyss, og ser også dette i naturleg samanhang med ei eventuell justering av sonestrukturen grunna samanslåing av tidlegare Hordaland og tidlegare Sogn og Fjordane fylker.

Samnanger kommunestyre ser på det som grunnleggjande positivt at det i 2018 vart innført ein ny og kraftig forenkla sonestruktur i Hordaland fylke. Den nye strukturen har gjort det enklare og for mange også billegare å nytta seg av kollektivtransport. Det gjeld også dei mange pendlarane til bergensområdet som er busett i Samnanger kommune. Samstundes understrekar Samnanger kommune at det vert opplevd urimeleg når sone A inkluderer alle kommunane i bu og arbeidsmarknadsregionen, med unnatak for Samnanger og den austlege delen av Bjørnafjorden kommune. I tillegg inkluderer sone A også BA-regionane Alver (med unnatak for Masfjorden) og Fedje.

Kommunestyret ser på det som naturleg at pendlarkommunar rundt Bergen er inkludert i denne sona, og meiner det er eit viktig bidrag til å gjera kollektivtransport meir attraktivt, og dermed også meir brukt. Kommunestyret anser difor at det er naturleg at Samnanger i framtida vert innlemma i same sone som andre kommunar i den same bu- og arbeidsmarknadsregionen.

Kommunestyret ber administrasjonen senda denne fråsegna til samferdselsutvalet, samt til den politiske leiinga i Vestland fylke, ved fylkesordførar og fylkesvaraordførar.

Øyvind Strømmen
Miljøpartiet Dei Grøne